

Naqqiut

Siunnersuut 9. august 2021-meersoq taarserpaa. (Ilanngussat allassimanerinit naqqiut)

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalakkersuisunit saqqummiunneqarpoq:

Kalaallit Nunaanni pinerluttulerinermik inatsimmik aamma Kalaallit Nunaanni eqqartuussisarnermik inatsimmik allanngueq pillugu inatsisissatut siunnersuut (Covid 19-imik il.il. tunillaassuunnerit pinaveersaartinniarlugit akiorniarlugillu iliuusissanik atorunnaarsitsinissaq pillugu immikkut piunasaqaatit atorunnaarsinneqarnissaannut aalajangersakkap atorunnaarsinneqarnera) pillugu Inatsisartut aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Tunngavilersuineq

Kalaallit Nunaanni pinerluttulerinermi inatsimmik aamma Kalaallit Nunaanni eqqartuussisarnermik inatsimmik allanngueq pillugu inatsisissatut siunnersuummut missingiut Naalakkersuisut tigumavaat.

Assersuutigalugu inissiisarfinni inissinneqartunut pulaartarnerit anisarnerillu annikillisinneqarnissaat pillugit periarfissat pillugit maleruagassat aalajangerneqarsimasut ataannalernissaat inatsisissatut siunnersuutip kinguneraa.

Kalaallit Nunanni eqqartuussisarnermik inatsimmik allanngueq pillugu inatsisissatut siunnersuutip (Covid-19-imik il.il. tunillaassuunnerit pinaveersaartinniarlugit akiorniarlugillu iliuuseqarnerit) akuersissutigineqarnissaa pillugu oqaaseqaammik qallunaat naalakkersuisuinit nalunaaruteqarnissamik 13. maj 2020 Naalakkersuisut akuersissuteqarput.

Inatsisissatut siunnersuut 25. juni 2020 Folketingimi akuersissutigineqarpoq, aamma pisortat privatillu pisortanut tunngatillugu pisussaaffii pillugit avaqqutsisoqarsinnaanera pillugu Justitsministereqarfiup malittarisassanik aalajangersaasinnaanissamik piginnaatinneqarnissaa, inatsimmik allannginerup kinguneraa.

Ingammik pinerluttulerinermi inatsisip aamma eqqartuussisarnermik inatsisip suliassaqarfiinut, nappaatit tunillaassortut pillugit qallunaat inatsisaanni Folketingimi inatsisissatut siunnersuutip saqqummiunneqarnerani akuersissutigineqarneranilu § 12 d, imm. 3-imi oqaasertaliunneqartut, Kalaallit Nunaannut nuunneqarnissaat inatsisip siunertaraa. Kalaallit Nunaanni Justitsministereqarfiup suliassaqarfii, covid-19-ip sapinngisat tamaasa atorlugit siaruariartoqqinnissaata pitsaaliornissaanut akiorneqarnissaanullu, assersuutigalugu

pinerluttunik isumaginnittut, pisariaqartinneqartunik sakkussaqaarnissaat matumuuna qulakkeerneqassaaq. Tamatuma peqatigisaanik Kalaallit Nunaannut inatsisit naleqqussarneqarnerisa pinissaat qulakkeerneqassaaq, taamaalilluni inatsisip piginnaatitsineratigut suliniutit eqqunneqarsinnaasut, Kalaallit Nunaanni nappaatit tunillaassortut pillugit inatsit malillugu Kalaallit Nunaanni Namminersorlutik Oqartussat suliniutaannut malinnaasinnaangussallutik.

Inatsit 2021-imi 31. decembari atorunnaarsinneqassasoq inatsisip § 4, imm. 2-ani takuneqarsinnaavoq.

Kalaallit Nunaanni covid-19-ip nappaatillu allat nalinginnaasumik navianaatillit sapinngisaq tamaat pitsaaliorneqarnissaat akiorneqarnissaallu pillugu Kalaallit Nunaanni naalagaaffiup oqartussaaffiisa aamma siunissami pisariaqartinneqartunik sakkoqarnissaat qulakkeerniarlugu, atorunnaarsitsinissamik immikkut piunasaqaatip atorunnaarsinneqarnissaa taamaammat siunnersuutigineqarpoq, taamaalilluni ilaatigut pinerluttulerinermi inatsimmi aamma eqqartuussisarnermik inatsimmi, inatsisillu taakku malillugit aalajangersarneqartut malillugit ilaatigut pisortat privatillu pisortanut tunngatillugu pisussaaffii pillugit avaqutsisoqarsinnaanera pillugu inatsisunik atuutsitsinermut ministeri aamma 2021-imi decembarip 31-iata kingorna malittarisassanik aalajangersaasinnaalissaaq. Assersuutigalugu inissiisarfinni pulaartarnerit anisarnerlu annikillineqarnissaat pillugit malittarisassanik aalajangersaasoqarnissaanik tunngaviliisumik, Covid-19-ip imaluunniit nappaatit navianaatillit allat aamma 2021-imi decembarip 31-iata kingorna suli tunillaassuussinnaanerat akerlilerneqarsinnaangilaq.

Kalaallit Nunaanni Pinerluttunik Isumaginnittut susassaqaafiini covid-19-ip siaruatsaaliornissaa pitsaaliornissaalu pillugu nalunaarummi nr. 1174 af 30. juni 2020-imeersumi inatsisitigut tunngaviliunneqartoq ataasiarlugu atorsimallugu Kalaallit Nunaanni Pinerluttunik Isumaginnittut ilisimatitsissutigaa. Namminersorlutik Oqartussat Kalaallit Nunaannut tikittussanik mattussinerat pissutigalugu, tigummineqarallartussatut eqqartuunneqartup massakut Danmarkimi Herstedvester Fængselimiittup pilersaarutaasumik nuunneqarnissaa, nalunaarummi § 21, imm. 1 malillugu taamaalilluni kinguartinneqarsimavoq. Nuummi Inissiisarfimmi tigummineqarallartunut immikkoortumut 2021-imi januarip naanerani pineqartoq nuunneqartussaasimagaluarpoq.

Kalaallit Nunaanni Justitsministereqarfiup oqartussaaffiisa taassuma saniatigut inatsisitigut tunngavik taaneqartoq atorsimangilaat, aamma naak tamanna atorunnaarsitsinissamik immikkut piunasaqaatip sivitsorneqarnerani imaluunniit atorunnaarsinneqarnerani inatsimmi nr. 1056 30. juni 2020-imeersumi piunasaqaataagaluarpoq, aalajangersakkap atorneqarnerata, sunniutaata, inatsisitigut isumannaatsuunermut kingunerisaasalu naliliiffiginissaat taamaammat periarfissaasimangilaq.

Kalaallit Nunaanni Justitsministereqarfiup suliassaqrifiini inatsisiliornerup Kalaallit Nunaanni nappaatit tunillaassortut pillugit inatsimmut tapertaanissaa siunertarineqarpoq, taannalu Kalaallit Nunaanni aqqissuussinermut pitsaanerpaamik aamma Kalaallit Nunaanni Namminersorlutik Oqartussat suliniutaannut aallartissimasunut naleqquttuunissaa anguniarlugu ilusilerneqarpoq. Inatsisip allanngortinnissaannut siunnersuutip massuma suliarineqarnerani Naalakkersuisunik taamaammat Justitsministereqarfik oqaloqateqarsimavoq, aamma Kalaallit Nunaanni nappaatit tunillaassortut pillugit inatsisissatut siunnersuutip nappaatit tunillaassortut pillugit inatsisissatut siunnersuut nutaaq 2020-imi decembarimi Folketingimi saqqummiunneqartoq aallaavigissagaa, siunnersuummut piumasqaataammat, Peqqissutsimik Naalakkersuisoqarfiup ilisimatitsissutigaa.

Kisianni qallunaat aalajangersagaat inatsisartut suliaannut tunngasumik nakkutilliinermik aqqissuussinissamik nutaamik imaqarpoq, tamatuma kingorna malittarisassat atuutilersinneqartussatut kissaatigineqartut ministerip pineqartup, Tunillaassortunik nappaalanersuaqarnermut ataatsimiititaliarsuup innersuussutai ilanngullugit, ataatsimiititaliamut Folketingimit pilersinneqartumut saqqummiussinnaassavai.

Ingerlatseriaatsip taamaattup assinga Kalaallit Nunaanni eqqunneqassanersoq Justitsministereqarfiup Namminersorlutik Oqartussat peqatigalugit eqqarsaatersuutigisimavaat, matumani tunillaassortunik nappaalanersuaqarneranut ataatsimiititaliarsuup inassuteqaatai kiisalu inatsisartut suliaannut tunngasumik nakkutilliinermik aqqissuussineq ataatsimiititaliamut Inatsisartut pilersissimasaannut saqqummiussisarfiusussatut ilusilik ilanngullugu.

Kalaallit Nunaanni Namminersorneq pillugu inatsimmi § 18, imm. 2-p malitsigaa. Ingerlatseriaaseq taanna Kalaallit Nunaanni nammineerluni aalajangiiffigineqassasoq tamatuma kinguneraa. Inatsisartut Naalakkersuisullu pillugit Inatsisartut inatsisaanni § 13, imm. 2 malillugu nalunaarutit Inatsisartunut saqqummiunneqarneq ajorput, taamaallaat Naalakkersuisunut saqqummiunneqartarlutik.

Kalaallit Nunaanni nappaatit tunillaassortut pillugit inatsimmi nutaami inatsisartut suliaannut tunngasumik nakkutilliinermik aqqissuussineq eqqunneqassappat, tamatuma peqatigisaanik nappaatit tunillaassortut pillugit inatsit malillugu allaffissornikkut maleruaqqusat aalajangersarneqartut, Covid 19-ip imaluunniit nappaatit nalinginnaasumik navianassusillit allat tunillaassuunnerisa kigaallatsinneqarnissaat pillugit allaffissornikkut maleruaqqusat naalagaaffimmi oqartussaasunit atuutilersinneqartunut tunngatillugu ingerlatsinerup assinga malinneqassasoq, Inatsisartut inatsisaanni tassani aalajangersarneqarsinnaavoq. Pinerluttunik Isumaginnittut pillugit suliassaqrifimmi, tunillaassuuttoqalersinnaanerata aarlerinartoqarnerata malitsigisaanik, inissinneqartut pisinnaatitaaffiisa annikillisinneqarnerat pillugit nalunaarusiarineqartut, nappaatit tunillaassortut pillugit inatsit nutaaq malillugu namminersorlutik oqartussat nalunaarutaat atuutilersinneqartut pillugit ingerlatseriaaseq malissaagaat taamaaliornikkut qulakkeerneqassaaq.

Inatsisip 30. december 2021-imi atuutilernissaa siunnersuutigineqarpoq.

Naalackersuisut missingiummut oqaaseqaataat

Ukiumi kingullermi takusatsitut nunarsuaq tamakkerlugu tunillaassuuttoqarneranik pitsaaliuineq tuniluunnerullu kigaallatsinneqarnissaa pillugu Kalaallit Nunaanni naalagaaffiup oqartussaaffiinit inatsisiliornermi atuuttussanngortinneqartuni periarfissat inuiaqatigiinni inatsisiliornermi aamma periarfissaasariaqartut Naalackersuisut isumaqarput.

Taamaammat kalaallit nappaatit tunillaassortut pillugit inatsisaanni malittarisassat assinginik pinerluttulerinermi inatsimmi aamma eqqartuussisarnermi inatsimmi ikkussisoqarnissaa pisariaqarpoq, taamaalilluni innuttaasut pisinnaatitaaffiinik killilersuisinnaaneq periarfissaalissalluni. Tamanna pingaartumik pinerluttunik isumaginnittut suliasaqarfiini atuutissaaq, tassani inunnet inissiisarfinni inissinneqarsimasunut pulaartarneq aamma anisarneq pillugit malittarisassanik aalajangiisoqarnissaa pisariaqarsinnaalluni, soorluttaaq inissinneqarsimasooq nappaammik nalinginnaasumik navianaateqartumik napparsimatillugu, pineqartup pisinnaatitaaffigisaagaluatut, piffissap ilaani inissinneqarsimasunik allanik katerisimaateqarsinnaatitaannginnissaa pillugu malittarisassiortoqarnissaa pisariaqarsinnaasooq.

Killilersuinerit taamaattut nalunaarummi aalajangersarneqartussaagaluarput, taannalu Namminersorlutik Oqartussanut oqaaseqarfigeqqullugu saqqummiunneqartussaalluni, aamma piffissami tassani inuiaqatigiinni tunillatsinnissamik aarlerinaatimut akuliunneq naleqqunnersooq tassani nalilersuiffigissallugu periarfissaassalluni.

Tamatuma peqatigisaanik naalagaaffimmi oqartussaasut suliasaqarfiini aqutsinikkut malittarisassat, inuiaqatigiinni malittarisassani eqqunneqarumaartussat, inatsisartut suliaannut tunngasumik nakkutilliivigineqarnermik misissuiffigineqarnissaat qulakkiissagatsigu pingaaruteqarpoq.

Pinerluttunik Isumaginnittut suliffeqarfiini tunillaassuunneq pitsaaliorneqarsinnaajunnaqqatillugu, Naalagaaffiup inatsisaanni putoqalinnginnissaa qulakkeerniarlugu, siunnersuutip massuma ataatsikkut suliarineqarnissaa pisariaqassaaq. Inatsisartunit oqaaseqaateqartoqartinnagu Folketingip siunnersuummik siullermeerinninnissaa tamatuma kingunerissavaa, kisianni oqaaseqaat tiguneqartinnagu siunnersuut Folketingimi aappasaaneerneqaranilu pingajussaaneerneqarsanngilaq.

Suleriaaseq taanna qaqutikkut atorneqartarpoq, suleriaatsillu immikkut ittumik pisoqartillugu aatsaat atorneqartarnissaa Naalackersuisut kissaatigaat, tassami Folketingi suliamik aallartisitsinnagu Inatsisartut oqaaseqaateqarnissaminnik periarfissaqarnissaat pingaaruteqarmat. Qinersisitsisoqarnissaa taassumalu kingunerisaanik ukioq manna ukiukkut-

upernaakkullu Inatsisartut ataatsimiinnissaasa unitsiinnarneqarnerat pissutaalluni, ajoraluartumik manna periarfissatuaasoq takuneqarsinnaanngorsimavoq.

Pisortani aningaasarsiornikkut allaffissornikkullu kingunerisassat

Soqanngilaq.

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Justitsministereqarfiup tusarniaaneq ingerlassimavaa, tassani kalaallit nunaanni oqartussaasut naleqquttut ilanngunneqarsimapput. Siunnersuut piffissami 2021-imi 26. januarimiit 16. februarimut tusarniutigineqarsimavoq.

Ilanngussat

1. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnissaannut Inatsisissattut Siunnersuummut eqikkaaneq
2. Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnissaannut Inatsisissattut Siunnersuut